

# Vizyon

## Seselwa pe soufer plis

**D**an laboutik ozordi, sak plastik dzetwal in tro gran pou met 2 pti komisyon. Biye R100 in vin parey larzan sanze. Marsan i tap de kou lo masin e son domaz i desot R100! Lavi anba Jj in tro for e lepep Seselwa pe soufer plis. E ki nou tande? Wi, Minis Finans ansanm avek IMF in dir ki 2009 pou pli dir ankor. Kote Seselwa pou ale? Ki mannyer eski nou pou nourri nou zanf an e met manze dan lasyet nou fanmiy?

### Oli plan pou double larises?

Pour eleksyon 2006, Mr. Michel ti dir byen for dan son kanpany ki i pou double larises lepep Seselwa. Ozordi ki nou antann IMF pe dir? Premyerman sa imsye i dir ki an 2008 nou lekonomi pa'n grandi ditou. I al pli lwen pou dir ki an 2009, keksoz pou negativ par -9.5%. Eski se sanmenm sa fason ki Mr. Michel pou fer grandi nou lekonomi e double nou larises? Seselwa, ekout byen letan sa bann dimoun pe koze, e zot ava dekouver ki vremen si nou dan sa sitiasyon kriz, i napa nanryen pou fer avek resesyon mondyal, me plito avek move planifikasyon SPPF.

### Jj napa direksyon

Seselwa ozordi pe war son pei parey en lapo koko dan laroul. I resanble ki gouvrenman in perdi tou direksyon. En zour nou al dan en direksyon, son lanmen keksoz i diferan. Lepep nepli konnen lekel ki pe koz laverite. PUC i dir en keksoz, SEPEC i rakont en lot

zistwar. Tou keksoz i dan brouyar, e Mr. Michel pa vin dir lepep sa ki pe vremen arive. I prefere fer nou war li letan i pe rankontre anbasader. Pa sa ki Seselwa i anvi. Seselwa i anvi konnen dan ki direksyon son pei pe ale. Seselwa i anvi lespwar pour demen.

### Servis pe koupe partou

En nenport dimoun ki regard byen sa ki pe pase otour li pou war ki tou keksoz pe deteryore. Ozordi bann klinik dan distrik i ouver serten zour selman. Tretman a-letranze in vin en kosmar pour bann pasyan. Dan lekol sitiasyon pe vin pli difisil. Dimoun pe demande kote nou pe ale? Akoz ki gouvrenman pa vin koz laverite, olye rod leskiz pour tou keksoz? Me selman letan SNP i koz lo sa bann size, napa gran promes e gran parol ki SPPF pa vin dir. Tou sa zis pou bat latet Seselwa.

### Aret blanm lemonn

I tre enportan pour nou kontinyen demann bann dirizan SPPF pou aret blanm lemonn pour nou problem. Se SPPF ki'n anmenm nou kot nou ete ozordi, e se zis zot ki responsab pour sa salte ki nou ladan. Aret fer parey sa madanm SPPF ki fek sorti Moris e dir ki keksoz laba in vin ser, kan pri i ankor parey, me li i pe ganny mwens akoz roupi Seselwa ki'n devalye!

### Sanz sa gouvrenman

Seselwa, nou bezwen sanz sa gouvrenman SPPF pour nou kapab war en lalimyer dan nou pei. Sesel i bezwen en gouvrenman SNP ki debout lo kote Seselwa e non pa lo kote etranze. Nou bezwen en gouvrenman ki regard sa ki pli vilnerab olye regard zis bann ki annan larzan. Sanman dan Sesel - 'Yes we can!'

## Kote Jj Foundation i ganny larzan?

**S**itiasyon ekonomik dan Sesel pabon. Lentere lo loan lakaz in ogmante e Seselwa pe soufer. Mr. Michel i prezidan nasyon Seselwa e prezidan Jj Foundation. Akoz ki son Foundation i kapab donn loan ziska R100,000 avek lentere 0-3%, me selman gouvrenman pe fer monte tou lentere lo loan tou fanmiy? Eski i kapab dir nou kote i ganny larzan pou fer politik e akoz i pa ganny larzan

pou ed tou Seselwa?

Annou fer sa bann refleksyon swivan: Lapey Mr. Michel i sipoze mwens ki R50,000, alor kote ki i ganny larzan pou donn bann zenn? Eski i annan etranze ki pe donn larzan? Si wi, lekel zot? Fodre ki lepep i konnen pou war si napa koripsyon oubyen faver spesyal tel ki nasyon-alite, oubyen pozisyon anbasader.

I annan tro bokou lalang dan sa zafer. 3,000 marm? Konbyen zafan? Dir nou.

# Eski ou krwar ki Jj i Kosto, Kapab e Konpetan?

# Rann kont sa 2.5 bilyon Dravyer pe ganny vole

**O**zordi Prezidan Michel pe demann lepep pou koste, kan sa ki Seselwa i oule, se pour li rode e dir nou lekel sa bann dimoun ki'n akimil \$2.5 bilyon. I son responsabilite koman Prezidan pou rann kont lepep. I ti promet pou vey nou aki. Lepep ozordi pe reklann sa ki i kwar in ganny pran malapropo afen ki sa lavi difisil i ava amelyore.

Son lapel pou linite, i en semen kourt ki msye Michel in swazir pou traverse. I napa kouraz pou demann en lanket detaye akoz i konnen ki bann non ki kapab monte i ava sok li akoz se bann dimoun pre avek li.

Se pourtan avan i ti ganny elekte an 2006, msye Michel ti dir ki i pare e

determinen pou ekri en lot sapit dan listwar Sesel. Nouvo depar ki nou oule se pour annan en dirizan ki annan kouraz pou rod laverite. Larealite i seki in annan labi dan lepase par bokou o zofisye ki ankor la dan ladministrasyon msye Michel.

Alor eski i per pou ofans zot e fer zot rann kont? Lepep pou bezwen ziz msye Michel par son aksyon. Ozordi i swazir pou fer malere pey lepokase tousel. Eski letan ou refize tir GST lo manze, malgre ou'n devalye nou rounpi, sa i touzour vedir ou annan en leker pou tou Seselwa?

Lepep pe dir ki fodre rann kont tou son larzan ki'n disparet dan sa 2.5!

**N**ouvo Sef Ekzekitif lazans transpor lo later in dir ki i pou pran ankor 5 a 10an pou tou semen lo Mahé vin an bon kondisyon. Alor keston ki dravyer pe demande se kote tou sa larzan ki gouvrenman pe ranmase lo patant loto pe ale?

Si i annan en total 19 mil transpor lo semen e gouvrenman i ranmas an mwayenn Rs1300 lo sak transpor, sa i fer en total Rs247 milyon par lannen. Minis Morgan lannen pase ti dir avek Lasanble Nasyonal zis Rs20 milyon ki servi par lannen pou mentenir semen. Alor

kote sa Rs227 milyon ki reste i ale?

Semen Sesel i an move kondisyon : napa ase lekler-az, i ranpli avek trou e napa baraz. Sa i en senp lekzanp move zestyon larzan piblik par gouvrenman SPPF. Alor annou mazin tou lezot taks ki zot ranmase e demann ou lekor si i pe ganny servi byen e dan landrwa kot i merite. Sanmenm ozordi nou dwa depi lipye ziska latet!

Avek tou keksoz ki pe ogmante, dryver i devret ganny en pli bon 'deal' pour sa ki zot peye.

## Promes vid Jj lo lakaz

**L**e 18 Zen 2006, dan son ladres pour Lazournen Nasyonal, Prezidan Michel ti dir ki dan sa prosen 5an i pou konstri plis ki 5000 lakaz. I ti osi promet avek tou sa ki'n deza fer laplikasyon pou aste en lakaz avek gouvrenman, ki i ti pou donn zot enn dan sa prosen 5an.

I enportan note ki Msye Michel ti fer sa langazman koman en manev politik pour li ranport eleksyon Prezidansyel an Zilyet 2006. Ozordi, pros 3an plitar, Msye Michel pa ankor delivre ni 10% lakaz ki i ti promet. Atraver Sesel i annan fanmiy ki plis ki 20an pe monte desann, pe espere.

5000 lakaz i en promes dan vid ki Msye Michel in fer, zis pou bat latet

Seselwa e aste zot vot pour eleksyon. I ti konn tre byen ki gouvrenman napa larzan pour en tel proze osi anbisye.

Minis Finans in dir ki avek sitiasyon ekonomik, gouvrenman zisteman pou bezwen revwar son polisi lakaz. Alor Msye Michel kote ou promes 5000 lakaz i rantre?

Polisi SNP i kler lo size lakaz. Nou kwar lakaz pa en keksoz pou servi koman en zouti politik. I drwa sak Seselwa pou viv dan konfor e i merit ganny led leta si i napa larzan. Alor nou pa pou zanmen fer okenn promes dan vid, zis pou aste vot dimoun e apre kit zot lo petet. Seselwa ouver nou lizeye.

## SNP: Sel lespwar pour zenn

Prezidan Michel pe enplor laznes Seselwa pou fer li konfyans. Me eski zot merit fer konfyans en tel endividi ki'n responsab pou plonz nou pei dan sa kriz ekonomik e ki pe menas zot lavenir? Olye rod solisyon pratik pou tir nou dan sa trou ki in met nou, msye Michel i pli enterese avek rod en 2enn manda koman prezidan. Kreasyon Fondasyon Jj Spirit i la zis pou sa.

Ensel kou, propagann 'be what you want to be' in ganny obliye e laspirasyon 2013 i dan en tirwar State

House. Langazman msye Michel ver laznes Seselwa i senpleman en lekzsis medya. Bann proze grandyoz parey kreasyon Fondasyon Jj Spirit, program Young Leaders ek Liniversite Sesel, i mank senserite e i zis pou piblisite.

Sa ki laznes Seselwa i vremen bezwen pou donn konfyans se en gouvrenman avek bon polisi ki pou fer en diferans dan zot lavi toulezour. Se zisteman sa lanbisyon SNP pou laznes. SNP i sel lespwar pour laznes Seselwa.

## PAS PARTOU

### Lekel ki pe koz manti?

PUC semenn pase in anonse ki i pa pou fer desann son tarif elektrisite, malgre pri karbiran lo marse mondyal in desann. SEPEC avek delegasyon IMF in konfirman ki Sesel i merit benefisye avek sa bes dan pri. Alor lepep pe demande lekel ki pe koz manti e akoz malere ki bezwen kontiyen pey latet koson?

### Kankan kot lopital

De semenn pase kankan ti'n roz kot lopital. Sa pti madanm ti maltret sa lekpi ki SBC ti'n anvoye pou fer enter-

vi avek li. I ti dir li i pa koz avek nenport ki zournalis. Fodre sef i desann li menm, akoz tou son travayer i enkonpetan, zot demann bann keston bet e fer dimoun rabase. Pov zournalis ti asot larm. Ki pe arive dan sa landrwa?

### 'Too hot, hot hot!'

Sa pti madanm aktivis SPPF dan Korgat in perdi tou lespwar. Apre tou sa kriye ki Jj i 'hot hot, hot', semenn pase i tya pe rod enpe diri avek son dalon dan kontour. Zafar i 'hot, hot, hot' e i annan en 'Jj fever' anba son talon. Ya pe osi tap lestoma e pe dir 'c'est ma faute'. Fodre zanmen ou bliye ki Jj ki 'right behind you!'

## Nou'n Kile

An promosyon ek lansman son nouvo album, **Alain Ernesta**, avek partisipasyon **David**

**André** ek lezot ankor i envit son bann 'fans' dan en gran 'Show' mizikal dan ICCS, **Dimans le 8**

**Mars 3pm.**

Sa zour i lazournen madanm. Desann bann madanm e vin selebre avek nou dan en latmosfer inoubliab.

**Nouvo CD pou an-vant.**

**Tiket R75 i deza anvant**



# SEL LESPWAR POUR SESEL

